

王云五主持

續修四庫全書提要

六

台灣商務印書館發行

王雲五主持

續修四庫全書提要

臺灣商務印書館發行

史部第二冊

除邪紀略一卷原則本

清楊摺撰。摺字蘊山。江蘇金壇人。是書蓋爲總督江南江西等處地方世襲三等男百齡作也。先是嘉慶二十年。湖北江西江南。先後拾獲緘封逆詞。雖事無端兆。而法必窮究。嗣經訪知安徽和州邪教匪犯金悛。歛錢惑衆案內。問擬充徒之巢縣人方榮升。名爲顯教。傳徒拜會。給散經卷。中多悖逆之詞。計前後捕獲一百七十七人。並搜獲九角龍文印記一顆。私造萬全天書。萬年時憲書。悖逆經卷。怪體字畫四篋。及定規寶卷。破邪顯正明心錄。大獄既成。先將逆黨方榮升寸磔處死。次將與謀巨魁朱上信。朱上忠。朱上林。朱世枝。嚴士融。嚴王氏。李喬林。劉李氏。及書寫逆詞之李元興。余伯在。胡大信。俞興德。呂祥貞。張泳清。王貴群。並佈散逆詞之楊榮先。殷正基。蘇瑞峰。李輜禮。賀泳福。趙榮貴。楊漢材。潘泳太。任智然等。二十四人。與知逆情之周智榮。趙順。許會組。楊松林。秦玉文。殷德佩。張錦。李輜英。方志元。王泳興等。凌遲斬決。傳衆示儆。家屬依律緣坐。財產沒官。方逆祖父母父母墳塋遣官創毀。餘犯吳起相等七十七人。區別情罪。較重者。擬發新疆給額魯特爲奴。次重者發各省駐防兵丁爲奴。稍輕者。擬請杖徒。其情輕改悔者。免罪釋放。辦理是獄。可謂嚴峻矣。老子曰。民不畏死。奈何以死懼之。愚民無知。信服邪教者。仍不絕於世也。

欽定平定回疆勦擒逆裔方略八十卷自刊本

楊鍾義撰

國朝道光九年曹振鏞等奉勅編。回部之先世爲準噶爾。所設有大小和卓木。波羅尼都霍集占被囚。乾隆二十

年平準噶爾。釋歸部。波羅泥都旋以叛伏誅。其子薩木薩克自拔克達山遁浩罕。有三子。次即張格爾。回俗信奉和卓。時贈以財物。嘉慶二十五年。冲巴噶什。愛曼布魯特。比蘇蘭奇。與張格爾合謀犯卡。經官方擊敗竄逃。道光甲申乙酉間。竄投喀拉提錦各部落。招集格得勒沙爲之羽助。六年六月勾結安集延布魯特煽脅恩回。搶斷臺路。八月連陷喀什噶爾。英吉沙爾。葉爾羌。和闐四城。命大學士長齡爲揚威將軍。武隆阿。楊遇春均參贊。統大兵進剿。賊至阿克蘇渾巴什河兩岸。經長清擊退。楊芳搜剿柯爾坪。七年二月大兵歷洋阿爾巴特。沙布都爾。阿瓦巴特。三月以次克復喀什噶爾。英吉沙爾。葉爾羌。楊芳復和闐城。張格爾窮竄邊外。率兵搜捕。十二月於卡外喀爾鐵蓋山生擒大寇。檄解京師。阿克蘇爲回疆八城居中要隘。渾巴什河爲南北要津。柯爾坪距阿克蘇三百餘里。東有和色爾湖。南有色靈兜。皆通巴爾楚克。西南有大郝紫爾。通喀什噶爾。西北有小郝紫爾。通烏什。洋阿爾巴特莊。爲喀什噶爾極東門戶。沙布都爾莊有草湖。深巢密林。阿瓦巴特莊依岡背河。林木叢密。爲喀什噶爾門戶。宣宗成皇帝有補詠五篇。書之戰圖。開館編纂方略。編年繫月。張格爾入卡滋事以前。隱括大凡。以爲張本。自命將興師。告功慶成。臚舉顛末。悉著于篇。

道光朝籌辦夷務始末八十卷 故宮博物院印本

清文慶等纂輯。書成於咸豐六年。自道光十六年議禁鴉片煙始。至二十九年暎夷不進粵城通商受撫止。先後十四年。凡上諭廷寄。及中外臣工之摺奏。下至華夷往來之照會書札。其有涉於夷務。而未盡載入實錄者。悉編年紀月。按日詳載。洵論外交者得失之林也。道光十六年四月。太常寺少卿許乃濟奏。鴉片例禁

愈嚴，流弊愈大。近年以來，夷商不敢公然以貨易貨，皆用銀私售。每歲計耗內地銀一千萬兩之多。請變通辦理，仍准其以貨易貨，其論殊爲有見。故兩廣總督鄧廷楨等覆奏，亦贊成之。於是御史袁玉麟則謂弛禁之議，戾於是非者有三。關於利害者有六。仍請益申厲禁之法。給事中黎鞏銘，則稱應責成該省督撫，勒令寄泊趺船，盡行歸國，而鴻臚寺卿黃爵滋上疏，以爲販煙之盛，由於食煙之家，無吸食，自無與販。今欲加重罪名，必先重治吸食。當日因始將湖南嘗以書諫，見七樓文經鈔，大旨以明種族已孤爲說，與許乃濟疏同。然議臣疏入，多主爵滋議。十八年遂命兩江總督林則徐前往廣東查辦海口事件，迨焚毀煙土，義律不服，騷擾海疆，一誤於琦善，再誤於耆英。五口通商白門之約成矣。此中國對外失敗之始也。而諸臣奏疏，猶以就撫效順爲辭，不亦重可哀乎。方林則徐在粵，曾有疏云：自道光元年至今粵海關已徵銀三千餘萬兩，收其利者，必須預防其害。若前此以關稅十分之一製礮造船，則制夷已可裕如。何致尙形棘手，殊批一片胡言。當同光間，王闕運作湘軍志，尙不以製礮造船爲然。如宣宗之責林，固無怪焉。

咸豐朝籌辦夷務始末八十卷 故宮博物院印本

清賈楨等纂輯。書成於同治六年。自道光三十年正月，起至咸豐十一年七月止。體例仍如前書。英人散入粵東省城之議，始於道光二十九年。延宕數載，議終不決。兩廣總督葉名琛，一味矜驕，毫無部署。咸豐六年九月，因水師在割艇內擊獲盜匪，英領事官巴夏禮乃藉端起釁，攻擊城垣。事機已迫，名琛猶迷信仙語，謂不出一月總可了事。七年十一月，英兵入城，竟攜掠名琛而去。遂釀成有清二百年來未有之恥。迨夷船闖入大沽口，礮臺被占，偏近京畿，朝議紛紜，尤多可笑。全慶、龐兆綸奏，宜會廣東義勇擄香港，以

率其援兵。登州水師合旗順以截其歸路。殷兆鏞奏。夷匪器猛烈。擬一破之法。令軍中多採舊絮被。愈急愈妙。以水濡透橫張爲蔽。諸如此類。直同呶語。道光時有謂洋人腰硬脚直。不能登陸者。此次勝保奏。猶言其腰足輻強。未能靈便。騎馬亦未能利捷。並此不知。而況其國情乎。旋經英倫提出四款。要求定約。仍以帶兵千名駐京。及視越國書二條。堅執不允。卒致乘輿幸熱。園庭被焚。城下之盟。辱莫大焉。至俄羅斯分界一事。亦相持日久。終歸失敗。語曰。弱國無外交。信非虛云。

同治朝籌辦夷務始末一百卷

故宮博物院印本

清寶璽等纂輯。書成於光緒六年。自成豐十一年七月起至同治十三年十二月止。體例仍如前書。前書於海外國人名。咸加口旁。此編則嘆夷咄夷。竝改稱英國法國矣。同治初。大難未平。英法皆願助戰。不惟文登展克名城。其功尤著。而華爾卜羅德勒伯勒東等。且俱臨陣捐軀。五年總稅務司赫德局外旁觀論。英公使威妥瑪著新議略論。皆極言內政外交之闕失。首倡借新法自強之議。於是京師開同文館。其後遂派學生出洋。江南設製造總局。製造火器。福建創立船政局。造輪船。習駕駛。從前守舊之風氣。乃稍稍變矣。其中最困難者。莫若天津市民毆斃法領事及焚燬教堂一事。九年五月。天津民教構釁。衆百姓毆斃法國領事。當將教堂焚燬。殺害二十餘命。並將其仁慈堂內貞女慘戮。直隸總督曾國藩奉命來津查辦。而法國公使羅淑亞。屢次照會總理衙門。欲將天津府縣。及提督陳國瑞。先行在津正法。一面以兵船伺候。勢將決裂。國藩不得已請以府縣交刑部治罪。因此遂負謗聲。太常寺少卿王家璧奏。傳聞該大臣奏辦情節。多有未符。不免於法國曲徇出脫。於津民過涉順求。安徽巡撫英翰奏。曾國藩手函自稱內疚神明。外慙清議。

而議者亦歸咎於曾國藩。謂其始終貽誤。亦無辭以自解。其實既欲善全和局。又思曲徇民情。設身處地。勢誠兩難。況津民旱饉豐大業外。尙殺害二十多人。置之不問。詎可謂平。蓋尊華攘夷之說。深入人心。故是書猶以籌辦夷務爲名。庚子義和團之亂。其所從來遠矣。

英吉利廣東入城始末一卷

仰視千七百二十九龜齋
叢書本

清七經河上釣叟記。釣叟不知何許人。其書自道光十三年。與英吉利議和許兵費銀二千一百萬元。定和約五年而一易始。至咸豐九年龔名琛在孟喀喇大里恩寺地方花園樓上病死止。記末記者曰。漢陽高語鎮靜。始氣驕志。坐誤事機。然夷所欲得而甘心者也。使其昏懦柔媚無足爲我梗。直視之而已。必不惡漢陽也。惡其爲梗。疑其有仇夷之心故也。心仇夷而術無以制夷。以爲夷無如何。此漢陽之所以敗也。辱身以辱國。且至蕩搖邊疆。而無能善其後。漢陽之罪大矣。是則誠然。又引文宗識曰。龔名琛剛愎自用。實則復而已矣。自用而已矣。何剛之有。當英人攻擊城垣。名琛日事扶鸞降乩。冀得神佑。此見於駱秉章奏疏者也。是記言其將行海外。猶求呂祖經一冊。在孟喀喇。日惟蚤起誦呂祖經。蓋其頑鈍無恥如此。先是廣州城陷。番禺縣知縣李福泰。繼室朱氏。盛服自殺死。其視總督之視顏苟活。不其賢乎。溫江王再咸紀事詩云。那有朱游能進藥。更無屈子賦懷沙。爲名琛作也。

英夷入粵紀略二卷

原稿本

清不著撰人名氏。卷中有曰松按者。松當是其名。而姓仍未詳也。道光十九年。命兩廣總督林則徐。爲欽差。來粵專辦烟土。英商義律。既繳烟土二萬餘箱。旋以計烟價爲名。攻沙角大角砲臺。則徐革職。以琦善爲欽差。授兩廣總督。於是將繳獲後駐兵與釘桶。盡行撤去。以致失守。英船遂直達省垣。因有入城之議。紀此事者。不止一書。然於當日實情。尙多隱諱。是編則直書無忌。其載琦善語義律云。打得快。和得快。粵人無不知其語。無不切齒。當非傳聞過甚之言也。又稱大將軍奕山。命廣州府余保純。總城說和。義律索銀六百萬圓。余不敢與爭。如數許諾。和議成。勒奕山。陸文。楊芳。並各省來粵之兵。俱要退出城四十里。然後夷船乃退出虎門。是以奕山。陸文住金山寺。惟楊芳。仍在省城。復載枯楊詞十八首。爲楊芳作也。有云。昔日芳榮得遇春。朱門依舊慣因人。如今老去當搖落。猶謝秋風百戰身。又云。費盡盤和殿上栽。桑條不稱棟梁材。要知大樹將軍號。都歷蟠根踏節來。遇春暗切昭勇侯遇春。可謂婉而多諷。惟當時風氣閉塞。其中有可笑者。如謂余保純遇夷人。夷人揭帽。余亦揭帽。道路以目。一時譁然。咸謂余以堂堂太守。而用夷禮。戾體傷教。蓋辱朝廷。又載道光二十一年。臺灣鎮總兵達洪阿。臺灣道姚瑩。嚴擊夷船。並斬獲夷人一事。以爲此天亡夷之兆。不知是乃遭風夷船。繞道貢功。與英人初無涉耳。至其謂庚子八月後。啓明伏不見。至十有二月始見。農人咸云。蓋農人被星而出。飯而後田。恒視啓明爲早炊之候。故備悉啓明隱見。松按宋書天文志。西晉懷帝永嘉二年。正月庚午。太白伏不見。二月庚子。始晨見東方。是謂當見不見。占爲百官庶民將流散之象。今啓明伏不見。當同此占。然按明史天文志。洪武二十五年三月丙午。辰星隱。至四月戊辰。復見。時正當承平。宋志之占。恐未必然。此其史識。殆遠在沈約上矣。

中西紀事二十四卷同治四年定本

楊鍾義撰

國朝夏燮撰。道光二十年海氛不靖。蔓延三載。宣宗以西人志在通商。不得已而允撫事之請。變於庚戌冬。蒐輯庚子以來邸抄文報。及西人紀載之可信者。詮次始末。咸豐己未續據見聞分類紀叙。十年入曾文正祁門幕府。時和議已成。罷兵換約。次前後奏咨各案及軍機檔臺往來文件。撰爲庚申續記。驗年見續領條約。暫定章程。並得魏默深海國圖志所載各檔案。同治乙丑釐定爲二十四卷。於英人入寇。及海疆用兵之利鈍。爲特詳。以續夏起於通藩。漏卮原於互市。邊衅之生。由於於此。爲前四卷。卷五至卷十四記英人窺邊請撫。粵東要撫。閩浙再犯。江上議款。白門原約。大沽前後之役。卷十五至二十一論庚申換約之役。天津新議續議。長江設關。洋藥上稅。小國換約。外夷助剿江楚黜教之事。以勦撫異同。管蠡一得爲二十二卷。末記海疆殉難諸臣。爲二十四上下卷。不著撰人姓名。署曰江上齋叟。以書中多所指斥也。其謂自長江開闢。無論大小船隻深入內地。山川道里險要形勢靡不周知。無論中國戰船未能制勝。即使購買外洋船砲。亦豈能過之。故洋艘之入長江。爲通商之大變局。自是孰論。伏讀康熙三十三年上諭。外藩朝貢固屬盛事。當以牧寧中國。培養元氣爲本。乾隆四十一年。刑部奏駁李質穎議英商欲不得其平。傳旨申飭。反覆數百言。洵爲輯內駁外之要圖。至於小雅盡廢。四夷交侵。枋相繼臣不能辭謀國之咎。是書詞直事顯。本末賅具。固當時得失之林矣。

聖武記十四卷三次重訂本

楊鍾義撰

民國魏源撰。源字默深。邵陽人。道光乙巳進士。官江蘇高郵州知州。博覽群籍。未第時爲內閣中書舍人。得觀史館秘閣官書。及私家著述。故老傳說。晚僑江淮。述開國以來兵事。爲聖武記十有四卷。開國龍興記第一。康熙戡定三藩記第二。綏服蒙古記。康熙親征準噶爾記。雍正兩征厄魯特記第三。乾隆蕩平準部記。戡定回疆記。綏服西屬國記。新贖後事記。道光平定回疆記。回疆善後記第四。綏服西藏記。西藏後記。乾隆征廓爾喀記第五。俄羅斯盟聘記。俄羅斯附記。國初征撫朝鮮記。乾隆征緬甸記。征撫安南記第六。雍正西南夷改流記。乾隆初征金川土司記。再征金川土司記。甘肅再征叛記。乾隆湖廣征苗記。嘉慶湖廣征苗記。道光湖廣平搖記第七。國初東南靖海記。康熙戡定臺灣記。重定臺灣記。乾隆三定臺灣記。嘉慶東南靖海記。康熙武昌兵變記。嘉慶寧陝兵變記。乾隆臨清勦賊記第八。嘉慶川湖陝靖寇記第九。嘉慶川湖陝靖寇記。畿輔靖變記。川湖陝鄉兵記。道光洋艘征撫記第十。兵制兵備第十一。掌故考證第十二。事功雜述第十三。議武五篇第十四。大旨謂我朝用兵異于前代者。兵少餉多。羽檄交馳。立即批答指示曲折。萬里如禁闥。無蓋功。無枉罪。無中使監軍之弊。而推本於以軍令肅人心。以軍事軍食延人材。因以推見民力之盛衰。人材風俗進退消長之本末。時當海疆不靖。感憤成書。議嘯亭雜錄超勇親王光顯寺一篇。於地勢賊情無一相應。朔漢方略從二次親征起。而初次烏爾布通之戰。不復追敘。第二次昭莫多亦不載。費湯古捷奏。於記末附載馬思哈股化行二紀。以捕所未備。議官書之失。莫患於兩不收。蓋分門各纂。互不相應。有此書與彼書互相矛盾者。皇朝通考以烏洛侯爲俄羅斯。而於已尼大水爲大北海。當從盛京通志。謂即魏書烏洛侯國難水。今黑龍江北之一泊。回部有元代成吉思汗後西域圖志。謂成吉思汗在派克巴之前。與元太祖同名。爲唐代以前回教之疆。當從外藩功績表傳。吐蕃乃元成吉思汗次子察罕伯受封之地。葉爾羌。和闐。阿克蘇各有元裔汗酋。則回部之有元裔乃明。四庫全書提要。謂元劉郁西使記所述葱嶺以西

各國。皆在新疆亭障堡戍間。四裔考又謂愛烏罕以西即西海。俄羅斯爲屬國兼有北海。皆不根無稽。辨難翔實。言地理掌故者所當取證也。

豫軍紀略十二卷 同治十一年刻本

楊鍾毅撰

國朝尹耕雲撰。耕雲字瞻甫。號杏農。睢寧人。遷桃源。道光庚戌進士。禮部主事。累官戶科給事中。河南河陝汝道。嘗從巡撫李鶴年徵州軍。輯成豫軍紀略一書。釐爲四目。一粵匪。洪楊倡亂。倡毒徧直省。咸豐三年賊黨由鳳陽陷永城。河南兵事於是始。五月陷歸德。犯開封。逼懷慶。七月大破賊柵。遂竄山西。八年糾豫捻圍固始。竄商城。擊走之。同治元年由潼關竄閿鄉。撲嵩縣。伊陽。葉縣。官軍堵勦於澠池。宜陽。汝州。郊縣。陳得才犯南陽。七月爲楚軍擊退。一會匪。各州縣舉行聯莊會以禦賊。禹州因鬧漕被擄。糾家爲匪。河北三郡相率效尤。八年有阜陽教匪糾結髮捻。切近陳汝。十一年有踞獲嘉中和鎮之會匪。彰德金樓鎮之教匪。搶攘其間。久之始定。一土匪。故事民出夫馬供支。漫無稽考。吏胥紳士因緣爲奸。歲用金錢按畝攤派。軍興以來。征調絡繹。追呼迫切。於是豫民大困。伏莽探丸相挽。起癸丑訖庚午。次第平定。一皖匪。卽捻匪。分黨焚掠。倉出僉入。莠民爲倡而助虐。疆吏查畛以禍鄰。中州當七省之衝。軍技於應。厥後張總愚北犯。自道口進西至太行山。東至黃河。築長圍斷賊歸路。諸軍乘其窮蹙。乃得殄滅。豫境始寧。亂不始豫。功不專豫。曰豫軍者。以豫爲主也。大致本諸章奏文檄。李汝鈞康曾定方吳翰吳保清實參訂焉。

欽定勦平粵匪方略四百二十卷

活字版本

楊鍾義撰

國朝同治十一年恭親王奕訢等奉勅撰。自三省叛匪平定後。人民安業者垂五十年。道光三十年六月。廣西賊洪秀全倡亂於桂平之金田村。命林則徐勦辦。未至軍而薨。起李星沅爲欽差大臣。推諉粉飾。賊勢漸熾。咸豐元年詔大學士賽尚阿代星沅。烏蘭泰向榮分勦獲勝。一挫於平南。再挫於永安。秀全自全州出水柳園長沙。掠舟洞庭。沿江而下。連陷武昌九江安慶。三年二月踞江寧爲僞都。陷鎮江揚州。分犯河南山東直隸。假擾者十有五省。披猖者十有五年。初大學士曾國藩以在籍侍郎奉命治鄉兵。創立舟師。至是成軍東討。四年四月塔齊布大破寇於湘潭。五年正月僧格林沁殄賊於連鎮。大學士官文以湖廣總督督師。與湖北巡撫胡林翼拔漢陽。擢武昌副黃雅晴。林翼駐軍宿松。籌議水陸東征。七年六月國藩拔九江。略定江西郡縣。遂克太湖潛山。進駐祁門。復安慶。同治元年授國藩協辦大學士。節制四省軍務。分道共舉。曾國藩以湘軍緣大江薄金陵。左宗棠以楚軍抵衢州援浙江。李鴻章以淮軍出上海規蘇常。于時楊載勳彭玉麟肅清長江。多隆阿圍攻廬州。李續賓派援潁州。鮑超進攻寧國。張運蘭防勦徽州。袁甲三軍淮上。都興阿防江北。馮子材守鎮江。二年五月水師克九洲州。江寧城圍合。十月鴻章克蘇州嘉興。三年二月宗棠克杭州。六月國荃等拔金陵僞都。九月生擒洪福瑱。四年十二月宗棠入福建。追寇至廣東嘉應州城焉。粵盜滔天之禍。根株鏟絕。軍務告竣。壬申九月表進方略四百二十卷。附設立長江水師章程。水師章程者。五年正月國藩奏定軍宜二十營制二十四。六月軍機大臣會奏依行。編章程六卷。入方略。垂示後世。願之天下焉。

欽定勦平捻匪方略三百二十卷 活字版本

楊鍾義撰

國朝同治十一年恭親王奕訢等奉勅撰。捻之爲寇。始於游民相聚。有拜幅。有拜捻。其後因以一聚爲一捻。或曰其黨明火劫人。燃紙然脂。故謂之捻。河南則歸陳南汝光固。山東則兗沂曹單嶧費間。江蘇則徐邳豐沛淮海。湖北則襄棗鍾隨。而安徽之鳳潁泗爲甚。鳳潁所轄蒙亳壽爲尤。嘉慶間比照回民之例。凡有結夥三人以上者。從重科斷。咸豐元年。南陽盜規事發。壽州盜亦上聞。二年關山輻盜拒教官弁。山東捻掠海州。安徽捻犯鹿邑寧陵。三年江表淪陷。宿蒙亳壽捻滋甚。四年袁甲三代周天爵治軍臨淮。屢有克捷。旋復四路竄擾。陰與粵匪連合。受其僞封。而張樂行李兆受之名稍有聞。遂至蔓延七八省。首尾十八年。分股數十。賊圩林立。官軍盡萃於粵匪。各省皆以其回老巢爲幸。未能專擊。十年二月陷清江浦。秋犯濟南。勅傅多噶台親王僧格林沁督師進討。同治二年克雋河集。禽斬張樂行。移軍蒙城。苗沛霖死。臨淮平。捻匪奔突剽掠。僧格林沁多尾追。恒數百里馳逐。以四年四月戰沒曹州。賊勢復振。擾及近畿。曾國藩設扼守黃運河之策。尋以李鴻章代國藩。復命恭親王節制左宗棠李鴻章及諸督撫。時捻有東西股。捻首張總愚擾秦中。任柱賴文光擾山東河南。議防運河扼膠萊。築長牆。北起夏店。南抵柳林口。逼賊騎西。六年寇任柱於嶺榆。賴文光圖竄青濟。覺之洋河瀾河間。文光走死揚州。東捻平。七年張總愚由陝竄河朔。騷築驢臨邑環遮之。馬賴徒駭黃運間。縱橫夾擊。張總愚蹈水死。西捻平。於時南服綏靖。並兵一向。得就蕩平。穆宗毅皇帝命將起滅始末纂爲方略。御製序文。謂良民久罹荼毒。罷兵之後。休養撫綏。不可不汲汲講求。非敢以勦除羣盜爲武功也。

欽定勦平捻匪方略二百二十卷 原刻本

清奕訢等奉勅撰。是書自咸豐元年。迄同治七年。凡關於平捻之諭旨章奏。靡不畢錄。首載咸豐元年二月十四日都察院奏言。據河南紳士王正誼。以捻匪窩竊勒贖。冒官搶掠等詞。赴臣衙門具控云云。蓋其事甚微。州縣得人。何致蔓延。凡亂之所。方其萌蘖。一牧令制之而有餘。及其鴽張。卒數省兵力滅之而不足。整飭吏治。詎非當務之急哉。捻匪倡亂十有餘年。雖未多據城池。其攻守亦不及粵匪。而剽悍善戰實過之。且其議忽披猖。甚於明季闖獻。及川楚教匪。故平之也難。至於李鴻章之戰績。則更有周世澄之淮軍平捻記十二卷在。可參考焉。

平定粵匪紀略十八卷附記四卷 光緒元年刻本

楊鍾義撰

國朝杜文瀾撰。文瀾字筱舫。山陰人。山道員歷署江蘇布政使。按察使。同治四年督鹽筴在鄂。官文恭屬輯平定粵寇一書。十一年重加改正。自廣西倡亂起。至生禽洪福瑱止。爲紀略十八卷。附記賊名。邪說。逆議。瑣聞四卷。戰功事蹟以各處奏報所奉諭旨爲經。鋪敘平演。有條目而無綱要。武壯公烏蘭泰忠勇恤士卒。江忠烈以知縣在軍前差遣。每事必諮。部將田學楷。金玉貴皆善戰。大兵合圍永安。武壯謂宜用鎖圍法以困之。東路宜益兵爲之備。而向忠武力主兵法。聞師必闕之說。賊果從缺處突圍東竄。自是逆倭鴽張。潮衛鄂皖相繼蔓延。以至金陵不守。張忠武起向忠武部下。先後奏捷數十。總統諸君當時和春等不能合意。奮力。恤忠顯功。以致巨穴久困而不拔。咸豐十年賊陷丹陽。忠武望賊營而馳。亂流渡河。人馬俱沒。

文宗初得奏報。有東南半壁倚爲長城。尙冀該提督不死。出爲國家宜勞之諒。又曰若張國樞不死。蘇常一帶何至屢瀕若此。此亦最大關鍵。是書皆未能詳述。取其編年繫月據事直書。或傳之在事之人。或見諸時人筆記。無所增益。重誌里識概置不書。他如勦除捻回。懲捕騎馬等賊。與粵匪無涉不書。亦有限斷。考賊亂本末者。可以觀其大略也。

吳中平寇記八卷同治庚午刻本

楊鍾羲撰

國朝畿勦撰。勦字□□無錫人。內閣協辦侍讀。撰文中書。歷保府道。咸豐十年金陵大營陷。賊方擾蘇松及浙東西。巡撫駐上海。安慶既克。曾國藩奏薦延建邵道李鴻章任江蘇軍事。鴻章由翰林倡率淮軍。同治元年增募淮勇。選將束伍。如陳學啓。劉銘傳。潘鼎新。張樹聲。周盛波等赴上海。用客將華爾戈登曰常勝軍。旋命撫蘇。其餉以江海關稅及釐捐爲大宗。始僱募英法弁兵。教練洋槍隊。開製造局。仿製西洋各火器。是年克服泰賢。南匯。川沙廳。金山衛。松江解圍。憑防解嚴。復青浦。嘉定。進取蘇州。復常熟。昭文。二年克太倉。崑山。新陽。吳江。震澤。八月復江陰。十月克復省城。十一月克無錫。金匱。於是裁撤常勝軍。奏減蘇松太倉浮糧。三年正月克宜興。荆溪。二月復溧陽。四月克常州。兜勦楊舍。周莊。華市等處黨賊。沿江腹地肅清。自統師東下迄功成。凡二十九閱月。兼收復皖浙所屬地方。勦從事戎幕。親見軍中始末委折。次爲吳中平寇記八卷。推本於朝廷知人善任。文正以人事君。爲近古所未有。同時周世澄撰有淮軍平捻記十二卷。趙烈文爲之序。宋陳達道孫威敏征南錄。藍鹿洲平靈紀略所自防也。